



Sifa zote njema ni Zake Mwenyezi Mungu Alietukamilishia dini yetu, na Akatubariki sisi na kutuchagulia Uislamu kuwa ndiyo dini yetu. Swala na salamu zimshukie mtumwa Wake na Mjumbe, aliewalingania watu wamtwi'i Mola wao na akawahadharisha dhidi ya ufujaji, uzushi, na kufanya ma'asia; Tunamuomba Mwenyezi Mungu Awabariki ahli zake, maswahaba zake, na wote walofuata nyayo zake hadi siku ya malipo.

Nimepashwa habari mimi kuhusu makala yaliyochapishwa kwenye ukurasa wa kwanza wa jarida la wiki, "Weekly magazine Edarat of Kanpur", lenye makao yake katika mji wa kiufundi wa Uttar Pradesh huko India. Katika makala hayo palikuwemo na maneno ya uchochezi dhidi ya utawala wa kifalme wa Saudi Arabia kuhusu kujiambatanisha kwao na imani iliyo thabiti ya Uislamu na upinzani wake dhidi ya mambo ya uzushi. Muandishi huyo akadai yakuwa imani ya Salaf (Watangulizi wetu wema katika Uislamu), inayoshikiliwa na inayolindwa na ufalme wa ki-Saudi haulingani na Sunnah. Kwa madai hayo, muandishi amekusudia kuzua mgawanyiko baina ya Ahlus-Sunnah na kuhimiza mambo ya uzushi na itikadi mbovu. Tabia hii, hapana shaka ni ya kuchukiza mno na hatari. Nia na malengo yake makubwa ni kuishambulia dini ya Uislamu, na kueneza mambo ya uzushi na upotofu kwenye njia ya haki. Na zaidi ya hapo, makala hayo yalikaliriri waziwazi mas-ala ya kusherehekea mazazi ya Mtume kama sababu ya kuanzisha mjadala kuhusu imani ya Ufalme na viongozi wake. Kwahivyo, nimeonelea yakuwa ni muhimu kuwapasha watu kuhusu mas-ala haya. Kwa kutaraji usaidizi kutoka kwa Mwenyezi Mungu (Subhaanahu wata'aalah), mimi nasema:

Hairuhusiwi kusherehekea mazazi ya Mtume (Sallallahu 'alayhi wasallam) wala ya mtu yoyote. Kwa hakika, ni lazima kuyakemea mambo kama hayo, kwani huwo ni uzushi katika dini. Mtume wa Mwenyezi Mungu (Sallallahu 'alayhi wasallam) yeye mwenyewe hakuisherehekea wala hakuwaamrisha wengine kumsherehekea yeye. Au kumsherehekea yoyote aliyekufa kabla yake miongoni mwa Mitume, au kuwasherehekea mabinti zake, au wake zake au jamaa zake wengine. Makhaliifa waongofu, maswahaba wa Mtume (Sallallahu 'alayhi wasallam) au wafuasi wao waliowaandama katika haki hawakusherehekea tukio hili, wala yeyote miongoni mwa wanavyuoni wa ki-Islamu katika qarne zilizopita.

Wao walikuwa wakizielewa mno Sunnah za Mtume (Sallallahu 'alayhi wasallam) kuliko sisi, walimpenda mno na wakafuata sheria kuwashinda wale walokuja baada yao. Lau kama kusherehekea mazazi yake ingelikuwa ni amali njema, basi na wao wangelitutangulia katika jambo hilo.

Sisi tumeamrisha kuandama (kufuata) na tukakatazwa kuzua. Hii ni kwa sababu ukamilifu wa dini ya Uislamu na utoshelezaji wa yale tuliyopewa na Mwenyezi Mungu na Mtume wake umekubaliwa na Ahlus-Sunnah wal Jamaa'ah, jum'iyah ya Waislamu ya maswahaba na wafuasi wao wema.

Imepokewa kutoka kwa Mtume (Sallallahu 'alayhi wasallam) yakwamba alisema:

"Mwenye kuzua kitu kisichokuwemo katika jambo letu hili, atakataliwa nalo." [Imepokewa na Bukhaaree na Muslim]

Na kulingana na riwaya ya Muslim, akasema Mtume (Sallallahu 'alayhi wasallam):

"Mwenye kufanya amali isiyokubaliana na jambo letu hili atakataliwa nalo."

Na katika riwaya nyengine, Mtume (Sallallahu 'alayhi wasallam) amesema:

"Shikamaneni na Sunnah zangu na Sunnah za Makhaliifa wangu walio katika uongofu. Jiambatisheni nayo (sunnah hizo) na muishikilie madhubuti kwa magego. Na jitahadharini na mambo mapya yanayozuliwa, kwani kila jipya linalozuliwa ni bid'ah na kila bid'ah ni upotofu."

Alikuwa Mtume (Sallallahu 'alayhi wasallam) akisema katika khutbah zake za ijumaa:

"Kwa hakika maneno yalio ya kweli kabisa ni yale ya Kitabu cha Mwenyezi Mungu (Qur'aan) na uongofu ulio bora zaidi ni ule wa Muhammad (Sallallahu 'alayhi wasallam). Na maovu yalio mabaya zaidi ni mambo ya kuzua (yalio mageni katika mafundisho ya Uislamu), na kila jambo lilizuliwa (katika Dini) ni Bid'ah, na kila Bid'ah ni Dhalaalah (njia mbaya, upotofu), na kila Dhalaalah mwisho wake ni motoni."

Kwahivyo hadeeth hizi zina hadhari kali kuhusu mambo ya kuzua na onyo yakwamba kitendo chochote kama hicho ni upotofu wa kumtoa mtu kwenye njia ya sawa. Mtume (Sallallahu 'alayhi wasallam) aliwaonya watu kuhusiana na uzito wa mambo hayo ya kuzua na matokeo yake mabaya. Kuna ahaadeeth nyingi sana za kuthibitisha hoja hii katika mas-ala haya. Na Allaah (Subhaanahu wata'aalah) Akasema (kama ilivyofasiriwa):

وَمَا آتَاكُمْ الرَّسُولُ فَخُذُوهُ وَمَا نَهَاكُمْ عَنْهُ فَانْتَهُوا

Na anachokupeni Mtume basi pokeeni, na anachokukatzeni jiepusheni nacho... [Soorah Al-Hashr 59:7]

Akasema tena Mwenyezi Mungu (Subhaanahu wata'aalah) (kama ilivyofasiriwa):

فَلْيَحْذَرِ الَّذِينَ يُخَالِفُونَ عَنْ أَمْرِهِ أَنْ تُصِيبَهُمْ فِتْنَةٌ أَوْ يُصِيبَهُمْ عَذَابٌ أَلِيمٌ ﴿١٣﴾

Basi wajihadhari wale wanaokaidi amri yake (Sunnah - njia za kisheria, maamrisho, vitendo vya 'ibaadah, matamshi n.k) (miongoni mwa vipote), usije ukawapata msiba au ikawafika adhabu iumizayo. [Soorah An-Nur 24:63]

Akasema tena Mwenyezi Mungu (Subhaanahu wata'aalah) (kama ilivyofasiriwa):

لَقَدْ كَانَ لَكُمْ فِي رَسُولِ اللَّهِ أُسْوَةٌ حَسَنَةٌ

Bila shaka mnao mfano mwema (ruwaza nzuri) kwa Mtume wa Mwenyezi Mungu. [Soorah Al-Ahzaab 33:21]

Akasema tena Mwenyezi Mungu (Subhaanahu wata'aalah) (kama ilivyofasiriwa):

وَالسَّابِقُونَ الْأَوَّلُونَ مِنَ الْمُهَاجِرِينَ وَالْأَنْصَارِ وَالَّذِينَ اتَّبَعُوهُمْ بِإِحْسَانٍ
رَضِيَ اللَّهُ عَنْهُمْ وَرَضُوا عَنْهُ

Na wale waliotangulia wakawa wa kwanza katika (Uislamu) - Muhaajireen na Ansaar, na wale waliowafuata kwa mwendo mzuri - Mwenyezi Mungu Atawapa radhi, nao wamridhie (Mwenyezi Mungu kwa hayo mazuri atakayowapa). [Soorah At-tawbah 9:100]

Akasema tena Mwenyezi Mungu (Subhaanahu wata'aalah) (kama ilivyofasiriwa):

الْيَوْمَ أَكْمَلْتُ لَكُمْ دِينَكُمْ وَأَتَمَمْتُ عَلَيْكُمْ نِعْمَتِي وَرَضِيْتُ لَكُمْ الْإِسْلَامَ دِينًا

Leo nimekukamilishieni dini yenu, na kukutimizieni neema yangu, na nimekupendeleeni Uislamu uwe dini yenu. [Soorah Al-Maaidah 5:3]

Aya hii inathibitisha waziwazi yakwamba Mwenyezi Mungu Mtukufu ameikamilishia dini huu Ummah wetu na akaubariki. Mtume Wake (Sallallahu 'alayhi wasallam) alifariki baada ya kuufikiliza ujumbe wa Mwenyezi Mungu kikamilifu pamoja na sheria zake zinazohusiana na maneno na vitendo. Kisha akatia mkazo yakwamba mambo yote yaliyozuliwa na watu na kuingizwa katika dini ya Uislamu ni uzushi na inatupasa kuyakatalia mbali, hata kama wazushi wenyewe waliyazua kwa nia nzuri. Imethubutu yakwamba maswahaba wa Mtume (Sallallahu 'alayhi wasallam) na wafuasi wao wema waliokuja baada yao walikuwa wakiwaonya watu dhidi ya mambo ya kuzua kwani wao (wazushi) kawaida huongeza mambo katika Uislamu na kuzipitisha sheria zisizoruhusiwa na Mwenyezi Mungu, sawa na wafanyavyo maadui wa Mwenyezi Mungu kamavile Mayahudi na Manasara waliofanya nyongeza katika dini yao na kuzua wasiyoruhusiwa na Mwenyezi Mungu. Na zaidi ya hapo, kuyaruhusu mambo ya uzushi katika Uislamu ni kukiri yakwamba Uislamu haukukamilika na una kasoro. Imani kama hiyo, sio kwamba ni mbovu peke yake, bali inakhalifu ayah ifuatayo, (kama ilivyofasiriwa): **Leo nimekukamilishieni dini yenu** na ahaadeeth za Mtume (Sallallahu 'alayhi wasallam) zenye kutuonya dhidi ya mambo ya kuzua.

Tunaposherehekea mazazi ya Mtume (Sallallahu 'alayhi wasallam) au ya watu wengine kila mwaka, ina maana yakwamba Mwenyezi Mungu hakuikamilisha dini kwa Ummah huu, na wala Mtume (Sallallahu 'alayhi wasallam) hakuwafikiliza watu yaliyopasa kufikilizwa kwao kuhusiana na maamrishi ya dini yao, mpaka hivi karibuni walipokuja watu wa baadae walipoanza kuzua katika dini, yale yasoruhusiwa na Mwenyezi Mungu, wakidhani yakwamba mambo hayo yatawakurubisha zaidi kwa Mwenyezi Mungu. Bila ya shaka hii ni hatari kubwa na ni kama kumlaumu Mwenyezi Mungu (Subhaanahu wata'aalah) na Mtume wake (Sallallahu 'alayhi wasallam); Haliyakuwa Mwenyezi Mungu (Subhaanahu wata'aalah) tayari ameshaikamilisha dini na kutimiza Baraka zake, na Mtume (Sallallahu 'alayhi wasallam) aliufikiliza ujumbe wake waziwazi na akawafundisha Ummah wake kuhusiana na njia zitakazowafikisha peponi na kuwaepusha na moto wa Jahannam.

Kulingana na hadeeth saheeh iliyopokewa na 'Abdullaah bin 'Amr bin Al-Aas (Radhiallaahu 'anhu), amesema Mtume (Sallallahu 'alayhi wasallam):

"Mwenyezi Mungu (Subhaanahu wata'aalah) hakumtumiliza mjumbe yoyote, isipokuwa alimshurutisha awaongoze watu wake kwenye njia aliyojua kuwa ni bora, na kuwaonya dhidi ya mambo aliyoyajua kuwa ni maovu." [Imepokewa na Imaam Muslim]

Ni jambo linalojulikana sana yakuwa Mtume wetu (Sallallahu 'alayhi wasallam) ni mbora wa Mitume wote, wa mwisho na alokuwa mkamilifu zaidi kuwashinda wote kuhusiana na njia aliyokuwa akiwalingania na kuwanasihia watu wake.

Lau kama kusherehekea milaad (maulidi) ingelikuwa ni kitendo cha dini kilichochaguliwa na Mwenyezi Mungu kwa watumwa Wake, basi Mtume (Sallallahu 'alayhi wasallam) angelikuwa amewaeleza mambo hayo watu wake na wangelisherehekea wakati wa uhai wake, au maswahaba zake wangelifanya hivyo. Kwa vile mambo hayo hayakutokea, basi ni wazi yakwamba Uislamu hauna uhusiano wowote na maulidi. Kinyume cha hivyo, jambo hilo ni miongoni mwa mambo ya uzushi ambayo Mtume (Sallallahu 'alayhi wasallam) aliwatahadharisha nayo watu wake kama tulivyokwisha kutaja hapo awali.

Jamhuri ya wanavyuoni - isitoshe kwamba wameyakataa mambo ya maulidi - lakini wameonya dhidi yake kulingana na ushahidi uliokwisha elezwa hapo mbeleni.

Kulingana na hukmu ya kisheria ya ki-Islamu, mas-ala yoyote yanayohusiana na uhalalishaji na mizozo yoyote baina ya watu, ni lazima yapelekwe katika kitabu cha Mwenyezi Mungu na Sunnah za Mtume Wake (Sallallahu 'alayhi wasallam) kwa mujibu wa maneno Yake Mwenyezi Mungu (Subhaanahu wata'aalah) kama ilivyofasiriwa:

يَتَّيِبَهَا الَّذِينَ ءَامَنُوا أَطِيعُوا اللَّهَ وَأَطِيعُوا الرَّسُولَ وَأُولَى
الْأَمْرِ مِنْكُمْ فَإِن تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ إِن
كُنْتُمْ تُؤْمِنُونَ بِاللَّهِ وَالْيَوْمِ الْآخِرِ ذَلِكَ خَيْرٌ وَأَحْسَنُ تَأْوِيلًا ﴿٥٩﴾

Enyi Mlioamini! Mtiini Mwenyezi Mungu na mtiini Mtume na wenye mamlaka juu yenu, walio katika nyie (Waislamu wenzenu). Na kama mkikhitalifiana juu ya jambo lolote basi lirudisheni kwa Mwenyezi Mungu na Mtume, ikiwa mnamwamini Mwenyezi Mungu na siku ya mwisho. Hiyo ndiyo kheri, nayo ina matokeo bora kabisa. [Soorah An-Nisaa 4:59]

Na akasema tena Mwenyezi Mungu (Subhaanahu wata'aalah) kama ilivyofasiriwa:

فَإِن تَنَزَعْتُمْ فِي شَيْءٍ فَرُدُّوهُ إِلَى اللَّهِ وَالرَّسُولِ

Na mkikhitalifiana katika jambo lolote (rejeleeni kitabu cha Mwenyezi Mungu na hadithi za Mtume kwani) hukumu yake iko kwa Mwenyezi Mungu [Soorah An-Nisaa 4:59]

Katika kuyarudisha mas-ala haya kwenye kitabu cha Mwenyezi Mungu, tutaona yakwamba inatupasa sisi kumfuata Mtume wa Mwenyezi Mungu (Sallallahu 'alayhi wasallam) katika maamrisha yake na kutukemea dhidi ya kila aliyotukatiza. Inazidi kutueleza yakwamba Mwenyezi Mungu Amewakamilishia watu dini yao. Kwahivyo maadamu maulidi si miongoni mwa mafunzo ya Mtume (Sallallahu 'alayhi wasallam) hayawezi kuwa ni sehemu ya dini tuliyokamilishiwa na Mwenyezi Mungu na akatuamrisha tushikamane nayo kwa kumfuata Mtume (Sallallahu 'alayhi wasallam).

Tena tunapolirudisha suala hili kwenye Sunnah za Mtume wa Mwenyezi Mungu (Sallallahu 'alayhi wasallam), hatuwakuti maswahaba wala Mtume mwenyewe, kuwa walikuwa wakifanya jambo hilo au wakiwahimiza wengine wawafanyie. Huu ni ushahidi wa waziwazi yakwamba maulidi si sehemu ya dini, bali ni miongoni mwa mambo ya kuzua na kuwaiga watu wa kitabu (Mayahudi na Manasara) bila ya mazingatio (ki-upofu) kwenye sherehe zao. Tukiuzingatia ugomvi huu, kila moja (alie na uchache wa busara na kuipenda haki na uadilifu), atashuhudia yakwamba kuyasherehekea mazazi ya mtu yoyote hakuhusiani na Uislamu. Bali ni miongoni mwa mambo ya uzushi ambayo Mwenyezi Mungu na Mtume wake (Sallallahu 'alayhi wasallam) wametoa onyo dhidi yake kwa mkazo.

Mtu mwenye busara na asihadaike kwa kuuona Ummah mkubwa wakilifanya jambo hilo kote Ulimwenguni kwa sababu haki inatambuliwa na kujulikana kwa dalili zake za ki-Sheria na wala si kwa vitendo vinavyofanywa na idadi kubwa ya watu.

Akasema Mwenyezi Mungu (Subhaanahu wata'aalah) kama ilivyofasiriwa kuwahusu Mayahudi na Manasara:

وَقَالُوا لَن يَدْخُلَ الْجَنَّةَ إِلَّا مَن كَانَ هُودًا أَوْ نَصْرَىٰ تِلْكَ أَمَانِيُّهُمْ قُلْ
هَاتُوا بُرْهَانَكُمْ إِن كُنْتُمْ صَادِقِينَ ﴿١١١﴾

Na walisema: 'Hataingia peponi ila aliye Myahudi au Mkristo.' Hayo ni matamanio yao tu (si hukumu ya Mungu). Sema: 'Leteni dalili zenu, kama nyinyi ni wasema kweli.' [Soorah Al-Baqarah 2:111]

Na pia akasema tena Mwenyezi Mungu (Subhaanahu wata'aalah) kama ilivyofasiriwa:

وَإِنْ تُطِيعْ أَكْثَرَ مَنْ فِي الْأَرْضِ يُضِلُّوكَ عَنْ سَبِيلِ اللَّهِ إِنْ يَتَّبِعُونَ إِلَّا
الظَّنَّ وَإِنْ هُمْ إِلَّا يَخْرُصُونَ ﴿١١٦﴾

Na kama ukiwatii wengi katika (hawa) waliomo ulimwenguni watakupoteza na njia ya Mwenyezi Mungu. Hawafuati ila dhana tu, na hawakuwa ila ni wenye kuzua (tu basi).
[Soorah Al-An-aam 6:116]

Baadhi kubwa ya haya mambo ya kuzua, juu ya maumbile yake ya ki-uzushi, kawaida hayasalimiki na maovu mengine kama vile mchanganyiko wa mikutano ya wanawake na wanaume, nyimbo zikitumbuizwa kwa vyombo vya miziki, ulevi, madawa ya kulevya, na yanayofanana na hayo. Huenda pia zikahusisha hilo ovu zaidi (nalo ni) la Shirk kubwa, kwa kuonyesha upindukiaji wa mipaka katika kumtukuza Mtume (Sallallahu 'alayhi wasallam) na watu wema wengine na kwa kumuomba yeye, kuomba msaada kutoka kwake, au kuamini yakwamba yeye (Mtume) anayajua yaliyofichamana na madai yote kama hayo yenye kumfanya Mu'min kuwa Mur'tad. Imepokewa hadeeth saheeh yakwamba amesema Mtume (Sallallahu 'alayhi wasallam):

"Jihadharini na ghuluww (kupindukia mipaka) katika dini, kwani kumewaangamiza waliokuweco kabla yenu."

Na vilevile akasema (Sallallahu 'alayhi wasallam):

"Musipite kiasi katika kunisifu mimi kama Manasara walivyofanya kwa Issa, mtoto wa Maryam. Mimi ni mtumwa tu. Kwa hivyo kwa urahisi semeni: Mtumwa wa Mwenyezi Mungu na Mjumbe Wake." [Imepokewa na al-Bukhaaree]

Inastaajibisha kuona yakwamba watu wengi sana hujitolea kwa juhudi kubwa kwenye sherehe hizi na kuzitetea kwa vishindo vikubwa; na huku huwaoni kuhudhuria aina fulani za 'ibaadah kama vile swala za kila siku ya ijumaa. Hawana hata haya, wala hawazingatii yakwamba wao wanafanya ma'asia. Bila ya shaka yoyote, hii yaonyesha udhaifu wa imani zao, kuto-ona mbali, na nyoyo zilizojaa kutu kwa ajili ya madhambi na ma'asia. Tunamuomba Mwenyezi Mungu (Subhaanahu wata'aalah) Atulinde pamoja na Waislamu wote. Inashangaza kuwaona wengi wao wanaamini yakwamba Mtume (Sallallahu 'alayhi wasallam) huhudhuria maulidi - kuamkuana nae na kumkaribisha. Mbali na kuwa huwo ni urongo usio na msingi, unakuwa ni upumbavu wa hali ya mwisho, kwani Mtume (Sallallahu 'alayhi wasallam) hatotoka nje ya kaburi lake kabla ya siku ya kufufuliwa, wala hatokutana na watu au kuhudhuria mikutano yao. Badala yake atabaki mumo humo kaburini hadi siku ya kufufuliwa na roho yake imetulia kwenye kilele cha juu kabisa na Mola Wake katika mahali Patakatifu.

Mwenyezi Mungu (Subhaanahu wata'aalah) Akasema (kama ilivyofasiriwa):

ثُمَّ إِنَّكُمْ بَعْدَ ذَلِكَ لَمَيِّتُونَ ﴿١٥﴾ ثُمَّ إِنَّكُمْ يَوْمَ الْقِيَامَةِ تَبْعُونَ ﴿١٦﴾

Kisha hakika nyinyi baada ya hayo ni wenye kufa. Kisha hakika nyinyi baada ya siku ya Kiama mtafufuliwa. [Soorah Al-Mu'mininun 23:15-16]

Na akasema Mtume (Sallallahu 'alayhi wasallam):

"Mimi ndie wa kwanza nitakaefufuliwa kutoka ndani ya kaburi siku ya kufufuliwa na nitakuwa wakwanza mwenye kuwashufaiya watu na wakwanza ambae shifa'a yake itakaekubaliwa."

Ushahidi huo ulokwisha tajwa kutoka kwenye Qur'aan na Hadeeth unathibitisha bila ya shaka yoyote yakwamba waliokufa watatoka makaburini mwao siku ya kufufuliwa peke yake. Wanavyuoni wote wa ki-Islamu wanaafikiana kuhusu jambo hilo. Inampasa kila Muislamu kujua mambo hayo wala asipotoshwe kirahisi na mambo ya bid'ah na ushirikina ulioletwa na watu wajinga wasiokuwa na ruhusa yoyote kutoka kwa Mwenyezi Mungu.

Amma kuhusu kumswalia Mtume (kutuma swala na salamu), basi hizo ni katika njia zenye kupendekezwa zaidi na ni amali njema kulingana na maneno yake Mwenyezi Mungu, (kama ilivyofasiriwa):

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ

وَسَلِّمُوا تَسْلِيمًا

Hakika Mwenyezi Mungu anamteremshia rehema Mtume; na Malaika Wake (wanamuomba dua kwa vile vitendo vizuri alivyovifanya). Basi; enyi Waislamu (mliopata neema hii ya kufundishwa haya na Mtume) mswalieni (Mtume, muombeeni rehema) na muombeeni amani. [Soorah Al-Ahzaab 33:56]

Na akasema Mtume (Sallallahu 'alayhi wasallam):

"Yeyote mwenye kuniswalia mimi mara moja, Mwenyezi Mungu Atamswalia yeye mara kumi."

Imefaridhiwa kila wakati, hususan kila mwisho wa swala. Imefaridhiwa katika tashah-hud ya mwisho ya kila swala na baadhi kubwa ya wanavyuoni. Imetiliwa mkazo mahali pengi, kama vile, pindi baada ya adhaan (muadhini), linapotajwa jina la Mtume (Sallallahu 'alayhi wasallam) siku ya ijumaa na usiku kabla yake kulingana na idadi ya ahaadeeth.

Haya ndiyo niliyokusudia kuyafafanua na kuyatilia mkazo kuhusu mas-ala haya. Ni matumaini yangu yakwamba yatamtosheleza kila yule ambae Mwenyezi Mungu Aliemuonyesha muangaza. Ni masikitiko yalioje kuwaona Waislamu wenye hima na bidii, wanaojulikana kwa kuwa na Imani imara na mapenzi ya Mtume (Sallallahu 'alayhi wasallam) wakiandaa sherehe kama hizo za uzushi. Na tuwaulize watu kama hao: Hebu tuambieni, ikiwa nyinyi ni miongoni mwa Ahlus-Sunnah na munasema kuwa munamfuata Mtume (Sallallahu 'alayhi wasallam). Jee, yeye (Mtume) au yeyote miongoni mwa maswahaba zake au wale waliowafuata wao waliwahi kufanya mambo hayo, au si chochote zaidi ya kuwaandama ki-upofu maadui wa Uislamu kutoka katika Mayahudi na Manasara na mfano wao? Mapenzi ya Mtume (Sallallahu 'alayhi wasallam) hayana mafungamano yoyote na kusherehekea mazazi yake. Kumpenda kihakika ni kwa kumtii, kuyaamini mafunzo yake, kujiepusha na aliyotukataza na kumuabudu Mwenyezi Mungu kulingana na alivyotufundisha. Vilevile yanafungamana mambo hayo kwa kumswalia (kumtumia swala na salamu) kila mara, haswa wakati anapotajwa na wakati tunaposwali.

Wahaabiyyah, kulingana na muelekeo wa maelezo ya muandishi huyo, si waanzilishi katika kuupinga uzushi kama huo. Imani yao ni kujiambatanisha na kitabu cha Mwenyezi Mungu na Sunnah za Mtume Wake (Sallallahu 'alayhi wasallam); kuandama nyayo zake na za wafuasi wake waongofu; kuamini na kuyatekeleza yaliyosemwa na watu wema waliotutangulia (ma-Salaf) na ma-Imaam wa ilimu na Uongofu, wenye uwezo wa kutoa hukmu za ki-dini kuhusu 'ilimu ya Mwenyezi Mungu, na Sifa Zake za Ukamilifu na Utukufu kama zilivyokwisha kuonyeshwa kwenye kitabu kitakatifu na Ahaadeeth Saheeh (mafunzo) za Mtume (Sallallahu 'alayhi wasallam) na kama yalivyopokelewa kwa moyo mkunjufu na maswahaba zake. Wahaabiyyah wanayaamini mambo hayo kama yalivyopokewa bila ya kuleta mabadiliko, wala kulinganisha na sifa za wana-adamu, kutoa mifano au kuzikataa Sifa hizo. Wameshikilia njia walizokuwanazo maswahaba na wafuasi wao kutoka katika miongoni mwa wenye ilimu, imani na uchaji Mungu. Wao wanaamini kuwa nguzo kubwa ya imani ni kushuhudia yakwamba hapana Mola apasae kuabudiwa kwa haki isipokuwa Mwenyezi Mungu na kwamba Muhammad ni Mtume wa Mwenyezi Mungu. Kwao wao, huu ndiyo mzizi wa imani na ni miongoni mwa kitagaa kikubwa chenye Utukufu.

Wao wanajua kulingana na maafikiano ya Waislamu, yakwamba mzizi huu unahitaji ilimu, kukubali, na kufuata. Inamaanisha yakwamba hapana anaestahiki kuabudiwa isipokuwa Mwenyezi Mungu Mtukufu, asie na mshirika kabisa. Inazidi kumaanisha ukanushaji wa ibaada ya kitu chochote kisichokuwa Yeye (Mwenyezi Mungu). Inaonyesha sababu ya kuumbwa Majinni na Wana-adamu; kwanini walitumiliza Mitume na kuteremshwa vitabu. Zaidi ya hayo, 'Ibaadah sio kujisalimisha kikamilifu na kuwa na mapenzi peke yake, bali vilevile ni kutii kikamilifu na kuwa na kicho. Uislamu ndiyo dini ya pekee itokayo kwa Mwenyezi Mungu na kusambazwa na Mitume na hakuna chochote, isipokuwa Uislamu, ndiyo dini ikubaliwayo na Mwenyezi Mungu ikiwa ni zamani au sasa. Mwenye kujidhalilisha kwa Mwenyezi Mungu kwa khiari yake na pia kwa kiumbe mwengine kinyume cha Mwenyezi Mungu, huyo ni mushrik (mpagani). Ni sawa na yule anaeswali kwa ajili ya Mwenyezi Mungu na kiumbe mwengine ubavuni Mwake. Amma kwa yule asojidhalilisha Kwake, basi atakuwa anafanya kiburi katika yanayompasa kuyatekeleza kwa Mola wake.

Amesema Mwenyezi Mungu (Subhaanahu wata'aalah) (kama ilivyofasiriwa):

وَلَقَدْ بَعَثْنَا فِي كُلِّ أُمَّةٍ رَسُولًا أَنِ اعْبُدُوا اللَّهَ
وَأَجْتَنِبُوا الطَّاغُوتَ

Na bila shaka tulimpeleka Mtume katika kila ummah (Jamii, Taifa) ya kwamba (akalinganie watu) "Muabuduni Mwenyezi Mungu (Peke Yake) na mwepukeni (Iblisi) muovu." [Soorah An-Nahl 16:36]

Kwahivyo, Imani ya Wahaabiyyah imegemezwa juu ya utekelezaji wa ushuhuda yakwamba Muhammad ni Mtume wa Mwenyezi Mungu na kuwachana kabisa na mambo ya uzushi, ushirikina na kila chenye kuhalifu Sheria.

Hii ndiyo Imani aliyokuwa nayo Sheikh Muhammad ibn Abdul-Wahhaab (Rahimahullaah) na ndiyo aliyowalingania watu. Yeyote mwenye kumzulia chochote kinyume na hayo, mtu huyo juu ya kwamba anasema urongo, pia anafanya madhambi makubwa na anadai mambo yasiyo na ukweli wowote. Hapana shaka yakwamba atayapata yale ambayo Mwenyezi Mungu aliyo waahidi kila mwenye kuzua urongo.

Sheikh anaonyesha - kwa kupitia mfululizo wa makala yake mashuhuri na vitabu vya ki-Ilimu kuhusiana na somo la "Udhihirishaji wa Upweke: *Laa ilaaha illallaah* " - yakwamba hapana apasae kuabudiwa kwa haki isipokuwa Allaah (Azza wa Jallah) na kwamba aina hii ya ibaada isiwe na Shirk ya aina yoyote, si kubwa wala ndogo. Mtu yoyote mwenye kuyafahamu maneno haya anakuwa na urahisi wa kutambua yakwamba mfumo wake hauna tafauti yoyote na ule mfumo walokuwa nao watangulizi wetu wema (Salaf), ma-Imaam wakubwa wenye ilimu na Uongofu. Kwa hakika yeye ameyahuisa yale yote waliyoyafanya maishani mwao kuhusiana na kumuabudu Mwenyezi Mungu Peke Yake na kuyatupilia mbali mambo yote ya uzushi na I'tiqadi za ki-Mila.

Huu ndiyo msingi wa Dola ya Saudi Arabia na rai hii ndiyo iliyodhihirishwa na Wanavyuoni wa Saudi Arabia. Ujeuri unao-onyeshwa na Serikali ya Saudia unafanyiwa dhidi ya itiqadi za ki-mila na uzushi unaopingana na Uislamu, au aina ya ufujaji wa kupindukia mipaka ambao umepigwa marufuku kabisa na Mtume Muhammad (Sallallahu 'alayhi wasallam). Waislamu wote, wanavyuoni na viongozi wa Saudi Arabia wanawaheshimu sana na kumpenda kila Muislamu pasi na kujali iwapo amejisajili na kikundi chochote au nchi yoyote Ulimwenguni. Wao wanapinga kila aina ya sherehe au mikutano ya mambo ya uzushi, yasiyokuwa na idhini itokayo kwa Mwenyezi Mungu na Mtume Wake (Sallallahu 'alayhi wasallam). Wanayinga hayo kwa sababu kila jambo jipya katika dini ni uzushi na pia kwa sababu Waislamu wameamrisha kufuata, na sio kuzua.

Uislamu umekamilika na unajitosheleza. Hauhitaji nyongeza yoyote baada ya Mwenyezi Mungu na Mtume Wake (Sallallahu 'alayhi wasallam) kuyakamilisha maamrisha na Ahlus-Sunnah wal Jamaa'ah, kuanzia kwa maswahaba, vizazi vyao, na yote yaliyopokewa na wafuasi wao. Kukataza kusherehekea mazazi ya Mtume (Sallallahu 'alayhi wasallam), kutokana na asili yake ya uzushi pamoja na ishara zake za israfu na Shirk inayohusiana nayo kama kawaida, sio ukafiri wala kumdharau Mtume (Sallallahu 'alayhi wasallam). Badala yake hicho ni kitendo cha utifu kwani

amesema Mtume (Sallallahu 'alayhi wasallam):

"Jihadharini na ghuluww (kupindukia mipaka) katika mas-ala ya dini. Kwa hakika waliokuwepo kabla yenu waliangamizwa kwa ajili ya kuwa na ghuluww (kupindukia mipaka) katika mas-ala ya dini."

Na akasema tena (Sallallahu 'alayhi wasallam):

"Musipite kiasi katika kunisifu mimi kama Manasara walivyofanya kwa Issa, mtoto wa Maryam. Mimi ni mtumwa tu. Kwa hivyo kwa urahisi semeni: Mtumwa wa Mwenyezi Mungu na Mjumbe Wake."

Haya ndiyo niliyoyakusudia kuyaeleza kuhusiana na makala hayo yaliyowahi kuchapishwa.

Tunamuomba Mwenyezi Mungu Atusaidie pamoja na Waislamu wote tuifahamu Dini Yake; na Azithibitishie nyoyo zetu, tushikamane na Sunnah na tujiepushe na mambo ya uzushi (Bid'ah). Kwa hakika Yeye ni Mkarimu na Mwenye Huruma. Na tunamuomba Mwenyezi Mungu Azifikilize Rehma Zake na Baraka Zake juu ya Mtume wetu Muhammad (Sallallahu 'alayhi wasallam), Ahli zake, na maswahaba zake.